

# NOS MINISTERIO DI REINO

## JULI 2013

### SIMAN DI 8 DI JULI

Cantica 43 y Oracion

#### Estudio di Bijbel di Congregacion:

Iv cap. 12 §1-12 (30 min.)

#### Scol di Ministerio Teocratico:

**Lesamento di Bijbel:** Echonan 15-17 (10 min.)

**Num. 1:** Echonan 16:16-34 (4 min. of menos)

**Num. 2:** Dicon un Cristian Por Ta Feliz ora E Ta Ser Persigui?—Mat. 5:11, 12 (5 min.)

**Num. 3:** Ora Apostel Pablo A Bisa Cu Cristian-nan Lo Ser Tuma pa Nan Ta Hunto cu Cristo, di Ki Topico E Tabata Papia?—rs-S pag. 46 §5—pag. 47 §1 (5 min.)

#### Reunion di Sirbishi:

Cantica 75

**10 min:** Metodonan di Predica e Bon Nobo —Dirigiendo Personanan Interesa na Jehova Su Organisacion. Discurso basa riba e buki *Organisa*, pagina 99, paragraf 2-4. Pidi esnan presente pa conta con nan a uza e foyeto *Boluntad di Jehova* pa dirigi nan studiantenan na e organizacion di Jehova.

**10 min:** Pone Jehova na Prueba, y Ricibi Asina Tanto Bendicion Cu Lo Bo No Tin Suficiente Luga pa Contene Nan. (Mal. 3:10) Entrevisita dos of tres pionero regular. Kico nan ta gusta mas di e trabou di pionero? Con e trabou di pionero a yuda nan hala mas cerca Jehova? Pidi nan pa conta algun experencia interesante cu nan tabatin. Na conclusion, anima e publicadornan pa pensa riba e posibilidad di bira pionero regular na september.

**10 min:** “Tuma e Profetanan Como Ehempel: Joel.” Pregunta y contesta.

Cantica 54 y Oracion

## Tuma e Profetanan Como Ehempel: Joel

<sup>1</sup> Ken e profeta Joel tabata? Wel, e unico cos cu el a bisa di su mes ta cu e tabata “yiu homber di Petuel.” (Joel 1:1) E humilde profeta aki

1. Con nos por imita Joel su humildad ora nos ta predica?

a hala atencion na Jehova su mensahe, y no na su mes como e mensahero. Asina tambe, den sirbishi, en bes di busca gloria of reconocimento pa nos mes, nos ta hala atencion di e hendenan na Jehova y na su Palabra, Bijbel. (1 Cor. 9:16; 2 Cor. 3:5) Ademas, e mensahe cu nos ta proclama ta fortalece nos. Cua ta e aspectonan di Joel su profecia cu por duna nos mas celo y speransa?

<sup>2</sup> ‘E Dia di Jehova Ta Cerca.’ (Joel 1:15): Aunke Joel a skirbi e palabranan aki miles di aña pasa, nos ta bibando den e tempo cu nan lo cumpli den nan totalidad. E condicion mundial cu ta sigui empeora y e indiferencia y bofon cu nos ta haya den territorio ta prueba convencente di cu e era malbado aki ta den su ultimo dianan. (2 Tim. 3:1-5; 2 Ped. 3:3, 4) Ora nos para keto y realisa con cerca e fin ta, nos ta haya mas motibo pa duna e trabou di predica prioridad den nos bida.—2 Ped. 3:11, 12.

<sup>3</sup> ‘Jehova Ta un Refugio pa Su Pueblo.’ (Joel 3:16): E temblamento describi den e versiculo aki lo suma luga ora Jehova eheculta su huicio durante e tribulacion grandi. Ta un consuelo pa sa cu Jehova lo libra su fiel sirbidornan durante e tempo ey. (Rev. 7:9, 14) Segun cu nos ta participa den e trabou di predica y ta experencia con Jehova ta sostene y fortalece nos, nos ta desaroya e fe y awante cu lo yuda nos enfrenta e tribulacion grandi cu ta na caminda.

<sup>4</sup> Aunke algun hende a describi e profecia di Joel como un mensahe di calamidad, e ta ofrece e pueblo di Dios e glorioso speransa di liberacion. (Joel 2:32) Pues laga nos enfrenta futuro cu confianza y proclama cu celo e bon noticia di e Reino di Dios segun cu nos ta haci caso di e palabranan di Joel 2:23: ‘Regociha y sea contento den Jehova boso Dios.’

2. E echo cu e dia di Jehova ta cerca mester motiva nos pa haci kico?
3. Dicon e trabou di predica ta asina importante awor cu e tribulacion grandi ta cerca?
4. Dicon nos por regociha y enfrenta futuro cu confianza?

## SIMAN DI 15 DI JULI

Cantica 48 y Oracion

### □ Estudio di Bijbel di Congregacion:

/v cap. 12 §13-22, cuadro na pag. 140 (30 min.)

### □ Scol di Ministerio Teocratico:

**Lesamento di Bijbel:** Echonan 18-21 (10 min.)

**Num. 1:** Echonan 20:17-38 (4 min. of menos)

**Num. 2: Cristo Lo Aparece Visiblemente Riba Nubia, Anto Hiba Cristiannan Fiel Cielo Mientras Cu Mundo Ta Wak?**—rs-S pag. 47 §2—pag. 48 §1 (5 min.)

**Num. 3: Con Nos Por Mustra Cu Nos Mente Ta Fiha Riba Spirito?**—Rom. 8:6 (5 min.)

### □ Reunion di Sirbishi:

Cantica 92

**10 min:** Yega na Curason di Bo Studiante. (Luc. 24:32) Discurso cu participacion basa riba e preguntanan aki: (1) Ora bo ta conduci un estudio di Bijbel, dicon ta importante pa enfatiza (a) Jehova su amor y sabiduria? (b) e balor di aplica principionan di Bijbel? (c) e importancia di semper busca Jehova su guia prome cu tuma un decision? (2) Con e siguiente preguntanan por yuda bo discerni si bo a yega na curason di bo estudiante? (a) Abo ta haya cu esaki ta razonable? (b) Abo ta haya cu esaki ta cuadra cu Dios su amor? (c) Si bo aplica e conseho aki, con bo ta kere cu e lo beneficia bo?

**20 min:** “Bo Ta Haci Esfuerzo pa Ricibi Privilegio den Congregacion?” Pregunta y contesta. Entrevista brevemente un anciano of sirbidor ministerial cu for di un edad hoben a haci esfuerzo pa alcansa privilegio den congregacion. Ki asignacion y entrenamiento el a haya prome cu a nombr'e como sirbidor ministerial? Con otro rumannan den congregacion a yud'e progres a spiritualmente? Ki bendicionnan el a ricibi como resultado di su esfuerzo pa alcansa privilegio den congregacion?

Cantica 85 y Oracion

## Bo Ta Haci Esfuerzo pa Ricibi Privilegio den Congregacion?

<sup>1</sup> “Si un homber ta haci esfuerzo pa bira un superintendente, e ta desea un trabou excelente.” (1 Tim. 3:1) E palabranan aki ta anima ruman hombernan pa haci esfuerzo pa ricibi privilegio den congregacion. Bo mester ta un adulto pa haci esey? Wel, lo ta bon pa bo cuminsa haci esfuerzo for di un edad hoben. Asina bo por ricibi entrenamiento y desaroya e cualidadnan necesario cu por yuda bo bin na consideracion pa sirbi como sirbidor ministerial ora bo bira grandi. (1 Tim. 3:10) Pues, si bo ta un ruman homber hoben batisa, ban wak kico bo por haci pa sirbi den congregacion.

<sup>2</sup> **Cultiva e Deseo di Yuda:** Corda cu bo ta haciendo esfuerzo pa alcansa un *trabou* excelente, no pa haya un titulo. Pesey, cultiva e deseo di yuda bo rumannan. Pa bo por logra esaki, bo mester medita riba e bon ehempel di Hesus. (Mat. 20:28; Juan 4:6, 7; 13:4, 5) Pidi Jehova yuda bo mustra interes den otronan. (1 Cor. 10:24) Bo por yuda rumannan cu ta malo di salud of di edad avansa? Bo ta dispuesto pa yuda cu trabou di limpieza y mantencion di e Salon di Reino? Bo ta ofrece bo mes pa duna parti boluntario den e Scol di Ministerio Teocratico? Lo bo ripara cu ora bo duna di bo mes

1. Ki ora un ruman homber hoben por cuminsa aplica e conseho di 1 Timoteo 3:1?
2. Con un hoben por cultiva y demostra e deseo di yuda?

**Debi cu tin asina tanto hende nobo ta bin den e berdad, mester di mas ruman homber spiritualmente capacita pa cumpli cu e responsabilidadnan di congregacion**

pa yuda otronan, lo bo ta hopi feliz.—Echo. 20:35.

**³ Traha Riba Bo Spiritualidad:** Un ruman cu kier sirbi den congregacion mester ta na prome luga un homber spiritual; esey ta mucho mas importante cu talento special of habilidad natural. Un homber spiritual ta haci esfuerzo pa mira cosnan manera Jehova y Hesus ta mira nan. (1 Cor. 2:15, 16) E ta desplega e “fruta di spirito.” (Gal. 5:22, 23) Ademas, e ta un evangeliado celoso cu ta pone interes di Reino na prome luga. (Mat. 6:33) Pa bo por desaroya cualidadnan spiritual, bo tin cu haci esfuerzo pa sigui un bon rutina di estudio personal. Esaki ta inclui lesa Bibbel tur dia y lesa cada edicion di *E Toren di Vigilancia y ¡Despertad!* Tambe ta importante pa prepara pa e reunionnan y asisti na nan. (Sal. 1:1, 2; Heb. 10:24, 25) Ora Pablo a anima e hoben Timoteo pa sigui haci progreso spiritual, el a skirbie e siguiente palabranan: “Presta atencion constantemente na ... e siñansa cu bo ta duna.” (1 Tim. 4:15, 16) Pues, prepara bon pa e partinan cu bo haya den e Scol di Ministerio Teocratico. Prepara y sali regularmente den sribishi. Pone metanan spiritual, manera, traha pionero, sirbi na Betel, asisti na e Scol Biblico pa Ruman Homber Soltero, y traha pa alcansa nan. Ora bo fortalece bo spiritualidad, esey lo yuda bo “huy for di e deseonan di hubentud.”—2 Tim. 2:22.

**⁴ Sea Fiel y Confiable:** Den prome siglo e apostelnan a nombre ruman hombernan “di bon reputacion”, cu tabata fiel y confiable, pa percura cuminda pa e cristianan den necesidad. Asina e apostelnan por a atende otro cosnan importante ya cu nan por a confia cu e ruman hombernan aki lo a cumpli cu nan asignacion. (Echo. 6:1-4) Pesey, ora bo haya un asignacion den congregacion, haci tur bo esfuerzo pa cumpli mas mihor posibel cu ne. Imita Noe, kende

3. Kico ta importante pa un ruman homber por sirbi den congregacion, y con e por desaroy'e?

4. Dicon ta importante pa bo ta fiel y confiable?

a cumpli exactamente cu tur e instruccio-nan cu el a haya pa traha e arca. (Gen. 6:22) Fieldad ta algo masha importante pa Jehova y e ta un muestra di madurez spiritual. —1 Cor. 4:2; wak e cuadro “E Beneficianan di Entrenamiento.”

**⁵ Manera Bijbel a profetisa, Jehova ta acelerando e cosecha spiritual.** (Isa. 60:22) Como promedio, tur aña 250.000 hende ta batisa. Debi cu tin asina tanto hende nobo ta bin den e berdad, mester di mas ruman homber spiritualmente capacita pa cumpli cu e responsabilidadnan di congregacion. Awor mas cu nunca tin hopi trabou den e sribishi di Jehova. (1 Cor. 15:58) Pesey, ruman hombernan hoben, boso ta haci esfuerzo pa ricibi privilegio den congregacion? Si ta asina, boso di berdad ta desea un trabou excelente.

5. Dicon ruman hombernan hoben mester haci esfuerzo pa ricibi privilegio den congregacion?

## E Beneficianan di Entrenamiento

Ruman hombernan hoben ehemplar ta progresia ora ancianonan duna nan asignacion y entrena nan. Un baha despues di reunion, un superintendente di circuito tabata sinta riba plataforma ta anima un publicador. El a nota cu un mucha homber tabata para den cerca-nia, pues el a puntr'e si e tabata war-dando pa papia cu ne. E mucha homber a contest'e cu e ta asigna pa stofzuig e plataforma despues di cada reunion. Su mayornan tabata cla pa bay cas, pero e no tabata kier bay sin cumpli cu su asignacion. Mesora e superintendente a baha for di plataforma. El a bisa: “Den e congregacion ey, e ancianonan tin cus-tumber di entrena hobennan ehemplar y duna nan asignacion den congrega-cion. Pesey ta masha normal pa cada bes cu mi bishita e congregacion, nan tin ruman homber hoben pa recomen-da como sribidor ministerial.”

## SIMAN DI 22 DI JULI

Cantica 22 y Oracion

### Estudio di Bijbel di Congregacion:

Iv cap. 13 §1-4, cuadronan na pag. 148-149, 158-159 (30 min.)

### Scol di Ministerio Teocratico:

**Lesamento di Bijbel:** Echonan 22-25 (10 min.)

**Num. 1:** Echonan 22:17-30 (4 min. of menos)

**Num. 2:** Den Ki Sentido Nos Ta den Mundo Pero No Parti di Mundo?—Juan 17:15, 16 (5 min.)

**Num. 3:** Ta Posibel pa Cristiannan Ser Hiba Cielo cu Nan Curpa Fisico?—rs-S pag. 48 §2-3 (5 min.)

### Reunion di Sirbishi:

Cantica 41

#### **10 min: Bo Ta Cla pa e Aña Escolar Nobo?**

Discurso cu participacion. Pidi esnan presente pa menciona algun reto cu hobennan cristian ta enfrenta na scol. Splica con mayornan por uza e *Index*, e dos bukinan di *Hobennan Sa Puntra*, nos website y otro provisionnan teocratico durante nan Adoracion Como Familia pa prepara nan yiunan pa e retoran cu nan lo enfrenta durante e año escolar. (1 Ped. 3:15) Scoge un of dos topico, y trata algun informacion beneficioso cu tin den nos publicacionnan. Pidi esnan presente pa conta con nan a logra duna testimonio na scol.

**20 min: "Dos Manera Nobo pa Predica den Area Publico."** Pregunta y contesta. Menciona ki areglo e congregacion tin pa predica na luganan publico uzando mesa of stand portatil di literatura, y conta algun experencia sobresaliente.

Cantica 95 y Oracion

## Dos Manera Nobo pa Predica den Area Publico

<sup>1</sup> E cristiannan di prome siglo no a predica solamente di cas pa cas. Nan a predica na luganan publico tambe. (Echo. 20:20) Por ehempel, nan a bay na e tempel caminda nan tabata sa cu nan lo a haya hopi hende.

1. Ki ehempel e cristiannan di prome siglo a pone pa nos?

(Echo. 5:42) Ora apostel Pablo tabata na Atenas, el a predica tur dia na e hendenan riba plasa. (Echo. 17:17) Awendia, sirbishi di cas pa cas ta keda e manera principal cu nos ta plama e bon noticia. Sinembargo, nos ta predica tambe den parkeerplaats, negoshi, parke, caya druk y na cualquier otro luga caminda cu nos por haya hende pa papia cu ne. Aunke tur publicador ta haya animacion pa predica na luganan publico caminda ta posibel, hopi di nos lo tin e oportunidad di uza dos manera nobo y emocionante pa predica den area publico.

<sup>2</sup> **Un Manera Special pa Predica den Area Publico den Stadnan Grandi:** Manera e *Anuario 2013* na Spaño ta bisa na pagina 16 y 17, for di november 2011, nos rumannan a purba cu un manera nobo pa predica den e areanan publico di New York. Nan a pone al-gun mesa y stand cu bunita posternan y literatura den diferente idioma na luganan strategico di e stad caminda tin hopi hende ta trafica na pia. Tur dia, miles di hende ta pasa na e luganan ey, incluso esnan cu ta biba den edificacionan bon proteha y esnan cu hopi biaha ta dificil pa haya na cas. E resultado tabata impresionante. Den un luna, e rumannan a distribui 3.797 revista y 7.986 buki. Hopi di esnan cu a pasa na e mesanan a pidi pa un estudio di Bijbel. E meta principal tabata pa cuminsa estudio di Bijbel. Pesey, asina cu e rumannan a haya un adres, nan tabata pas'e mesora pa e congregacionnan corespondiente pa nan por rebishita e persona interesa.

<sup>3</sup> En bista di e bon resultado cu e manera nobo aki tabatin, a decidi pa cuminsa cu ne na otro stadnan grandi, rond mundo. Cada sucursal ta decidi den cua stad na e paisnan cu ta cay bou di nan lo por uza e manera nobo aki di predica. Por lo general, lo scoge stadnan cu tin stacion grandi di transporte publico, hopi oficina of apartamento caminda tur dia miles di hende ta trafica na pia. E sucursalan lo tuma contacto cu e congreg-

2. For di november 2011, nos rumannan a cuminsa purba cu cua manera nobo pa predica den area publico?

3. Con lo bay expande e manera nobo aki di predica den areanan publico?

gacionnan cu lo participa den e manera nobo aki di predica y lo duna nan mas instruccion. Por lo general, lo uza pionero special y regular pa e trabou aki, aunke cu den algun luga pioneronan auxiliar tambe lo por participa.

**<sup>4</sup> Con pa Predica na e Manera Aki:** Por lo general, e pioneronan cu ta predica na e manera special aki den stadnan grandi ta war da te ora un hende bin na e mesa of stand di literatura. Ora e persona yega cerca, e pionero ta anim'e pa scoge cualquier publicacion cu e ta haya interesante. Ademas, e pionero ta cla pa uza Bijbel pa contesta cualquier pregunta cu e persona por tin. Si e persona scoge algun literatura, e pionero no ta menciona e areglo di donacion. Pero si e persona mes puntra con nos obra ta ser financia, e ora ey e pionero ta splic'e cu e por manda su donacion na e adres cu tin den e literatura. Si ta posibel, e pionero por puntr'e: "Bo ta desea pa un persona bishita bo na cas?" Of, "Bo tabata sa cu ademas di nos publicacionnan, nos ta ofrece estudio di Bijbel gratis tamb'e?"

**<sup>5</sup> E manera nobo aki ta duna goso y satisfaccion.** Un pareha casa a skirbi: "Tur dia ora nos ta para na e mesa y ta mira miles di hende cana pasa, nos ta realisa cuanto esfuerzo ta ser haci pa alcansa hende rond mundo. Si, e echo cu nos ta mira asina tanto hende y ta comprende quanto interes Jehova tin den cada un di nan ta fortalece nos determinacion pa mantene e trabou di predica na pro me luga den nos bida. Nos ta imagina nos mes cu Jehova ta analisa curason di e personanan cu ta cana pasa e mesa pa wak ken ta esnan digno. Nunca prome nos a sinti cu nos ta traha asina estrecho cu e angelnan."

**<sup>6</sup> E Trabou di Predica den Area Publico Cu Cada Congregacion Por Organisa:** Fue-

4. Con e rumannan ta predica na e manera special aki den stadnan grandi?
5. Con e manera di predica aki a duna un pareha goso y satisfaccion?
6. (a) Cua manera nobo pa predica den area publico hopi congregacion ta organisando, y dicon esaki no ta mescos cu e manera special pa predica den areanan publico den stadnan grandi? (b) Con congregacionnan por cooperar cu otro ora di predica den area publico?

ra di e manera special pa predica den area publico den stadnan grandi, tin un mane ra nobo mas di predica na luganan publi co cu hopi cuerpo di anciano ta organisa pa nan teritorio. E manera nobo aki ta encera cu publicadornan ta uza mesa of stand portatil pa pone literatura na luganan *den teritorio di nan congregacion* caminda tin hopi hende ta pasa. Esaki no ta mescos cu e mane ra special pa predica den areanan publico den stadnan grandi caminda rumannan di dife rente congregacion ta predica den e mesun areanan druk di e stadnan cu sucursal scoge. (Wak e cuadro "Bon Cooperacion Ta Necesario.")

## Bon Cooperacion Ta Necesario

Informenan ta indica cu tin publicadornan di diferente congregacion ta predica den e mesun parkeerplaats, parada di bus, den e mesun cayanan y dilanti di e mesun negoshinan. Ademas, publicadornan di diferente congregacion ta laga revista den e mesun lobby, sala di espera of laundry y ta predica den e mesun negoshinan. Aunke e publicadornan no ta predica na e mesun ora, esaki por fada e comercianten y e hendenan den e bari onan ey. Pesey, ora di predica den area publico, ta mihor pa *cada congregacion haci esey den nan mes teritorio*.

Si tin publicador cu kier predica den un area publico den teritorio di un otro congregacion, nan mester papia cu nan superintendente di sirbishi. E superintendente di sirbishi, na su turno, lo por tuma contacto cu e superintendente di sirbishi di e otro congregacion pa haya permiso. Caminda tin congregacion di diferente idioma ta predica den e mesun teritorio, e superintendente di sirbishi mester comunica cu otro pa evita situacionnan cu por pone e hendenan den e teritorio rabia cu nos innecesariamente. Si tin bon cooperacion, tur cos lo por tuma luga "decentemente y na un manera ordena." —1 Cor. 14:40.



<sup>7</sup> E ancianonan lo analisa y determina si den nan teritorio tin luganan caminda hopi hende ta trafica na pia y si ta practico pa predica na e luganan ey. Por ehempel, rumannan lo por pone mesa of standnan portatil di literatura na luganan, manera stacion di bus, parke, caya cu ta druk, centro comercial, campus, aeropuerto of luganan caminda ta tene actividadnan anual. Lo ta bon pa pone e mesa semper na e mesun luga, e mesun dianan y ora. Experiencia ta muestra cu ta mihor pa pone un mesa na un centro comercial y no caminda cu tin un negoshi grandi so, ya cu e hendenan cu ta bishita e negoshi ey normalmente ta concentra solamente riba loke nan a bin haci na e negoshi. Riba trottoir caminda hopi hende ta pasa kisas ta mihor pa uza un stand chikito di literatura. Ancianonan lo por download for di nos website algun file special cu ta contene algun idea con pa traha e standnan pa pone e revistanan *E Toren di Vigilancia y ¡Despertad!* y e buki *Bijbel Ta Siña*. E filenan aki ta

7. Si e ancianonan determina cu ta practico pa predica di e manera aki na luganan publico den nan teritorio, con nan lo por organisa esey?

ser uza specialmente pa e manera aki di predica. E publicadornan cu ta participa den e forma di predicacion aki tin cu sigui e mesun metodo di e manera special pa predica den area publico den stadnan grandi. Ademas, nan tin cu sigui e instruccionnan cu nan ta ricibi di e superintendente di sribishi. Si nan topa un persona cu mustra interes pero cu nota biba den nan teritorio, mesora nan mester yena e formulario *Por Fabor Atendé* (S-43-PA) y entreg'e na e secretario.

#### <sup>8</sup> Abo Tambe Por Predica na Luganan Publico:

Tin congregacion cu no tin ningun luga den nan teritorio caminda hopi hende ta trafica na pia y pesey nan lo no uza mesa of stand di literatura pa predica. Sinembargo, hasta den e congregacionnan ey ta bon pa anima publicadornan pa predica na luganan publico. Por ehempel, tin area di negoshi, centro comercial chikito, pacus of tienda cu sa ta druk den boso teritorio? Tin parke of plaza caminda hende sa reuni? Sa tin actividadnan publico den boso teritorio? Si ta asina, abo tambe por predica den e areanan ey.

<sup>9</sup> Ta Jehova su boluntad pa “tur sorto di

hende ser salba y yega na un conocemento exacto di e berdad.”

(1 Tim. 2:4) Ta pesey nos tin cu haci nos maximo esfuerzo pa hiba e mensahe di Reino na mas tanto hende posibel prome cu e fin yega. (Mat. 24:14) Den hopi teritorio ta dificil pa haya hende na cas. Kisas ta na luganan publico so nos por haya un chens di papia cu nan. Esey lo por ta e unico oportunidad pa algun di nan scucha e bon noticia. Pesey, laga nos predica na hende na unda cu nan ta y asina cumpli cu nos sribishi cabalmente.

—2 Tim. 4:5.

8. Hasta si den bo congregacion no tin areglo specifico pa predica na luganan publico, con bo por participa toch den e forma di sribishi aki?

9. Dicon nos mester haci esfuerzo pa predica na hende na unda cu nan ta?



## SIMAN DI 29 DI JULI

Cantica 51 y Oracion

### □ Estudio di Bijbel di Congregacion:

/v cap.13 §5-15, cuadro na pag. 150  
(30 min.)

### □ Scol di Ministerio Teocratico:

**Lesamento di Bijbel:** Echonan 26-28  
(10 min.)

**Num. 1:** Echonan 26:19-32 (4 min. of menos)

**Num. 2:** Lo Hiba Cristiannan Fiel Cielo den  
Secreto sin Cu Nan Muri?—rs-S pag. 49 §1-4  
(5 min.)

**Num. 3:** Den Ki Manera Dios Su Spirito Ta  
Obra den Su Sirbidornan?—Gal. 5:22, 23;  
Rev. 22:17 (5 min.)

### □ Reunion di Sirbishi:

Cantica 96

**10 min:** Papia na un Manera Natural den Sirbishi. Discurso basa riba e buki Skol di Ministerio, pagina 128, paragraf 1, te cu pagina 129, paragraf 1. Tene un entrevista breve cu un publicador cu a vence su timidez. Kico a yud'e controla su nervionan den sirbishi?

**10 min:** Caha di Pregunta. Discurso cu participacion na encargo di un anciano.

**10 min:** Demostra Cu Bosco Ta Yiu di Bosco Tata. (Mat. 5:43-45) Discurso cu participacion basa riba e Anuario 2013, na Spaño, pagina 89, paragraf 3, te cu pagina 90, paragraf 1, y pagina 164, paragraf 2. Pidi esnan presente pa commenta riba loke nan a siña for di e experencianan.

Cantica 80 y Oracion

## CAHA DI PREGUNTA

### ■ Te na ki grado un publicador no-batisa mester asisti na e reunionnan y participa den sirbishi pa e por batisa?

E decision di mas importante cu un hende por tuma ta di batisa. Pesey, prome cu un publicador por batisa, e mester por comprende, te na un grado rasonabel, kico Dios ta rekeri di dje. Ademas, mester ta bisto cu e ta determina pa biba segun Dios su rekisitonan.

Bijbel ta anima cristiannan pa no keda sin bay e reunionnan, pues, un publicador no batisa mester asisti regularmente na e reunionnan di congregacion. (Heb. 10: 24, 25) Por lo general, e ta participa tambe den e reunionnan cu su comentarionan. Y probablemente e lo ta inscribi den e Scol di Ministerio Teocratico, aunke esey no ta un rekisito.

Ademas, cristiannan a haya e tarea di predica e bon noticia y haci discipel. Pues, un publicador no-batisa mester participa regularmente den sirbishi prome cu e batisa. (Mat. 24:14; 28:19, 20) Pa quanto tempo e mester ta un publicador prome cu e batisa? Lo ta bon pa dun'e suficiente tempo p'e por duna prueba di su determinacion di

participa cu celo riba un base regular den e trabou di predica. (Sal. 78:37) E tempo ey no mester ta hopi largo si. Kisas djis algun luna despues cu e bira publicador lo e por bin na consideracion pa batisa. Cuanto ora di sirbishi e tin cu reporta? No tin un regla estriicto pa esaki. E ancianonan tin cu tene cuenta cu e circunstancianan di cada publicador y ser rasonabel.—Luc. 21:1-4.

E ancianonan (of den congregacion cu tin tiki anciano, e sirbidornan ministerial) cu ta reuni cu un candidato pa bautismo tin cu tene cuenta cu cada persona ta diferente. Pues nan tin cu uza sano huicio pa determina si e ta cualifica pa bautismo of no. E ancianonan ta supone cu e publicador tin desejo di ta un Testigo di Jehova, ta mustra aprecio pa e privilegio di asocia cu Jehova su organizacion y ta participa den e trabou di predica. Nan ta comprende si cu ainda e no a crece na madurez spiritual ni no tin e habilidadnan di un publicador cu experencia. Si e ancianonan ta haya cu e candidato no ta cumpli cu e rekisitonan pa batisa, nan mester splic'e na un manera amoroso kico ta e motibonan biblico cu a pone nan yega na e decision ey y percura p'e haya e yudansa spiritual cu e tin mester.

## SIMAN DI 5 DI AUGUSTUS

Cantica 77 y Oracion

### Estudio di Bijbel di Congregacion:

/v cap. 13 §16-26, cuadro na pag. 156 (30 min.)

### Scol di Ministerio Teocratico:

**Lesamento di Bijbel:** Romanonan 1-4 (10 min.)

**Num. 1:** Romanonan 3:21–4:8 (4 min. of menos)

**Num. 2:** Dicon Cristian Berdadero Ta Considera Nan Mes “Stranhero y Habitante Temporal” den Mundo?—1 Ped. 2:11; 1 Juan 2: 15-17 (5 min.)

**Num. 3:** Ki Proteccion Cristiannan Berdadero Lo Ricibi Durante e Gran Tribulacion?—rs-S pag. 50 §1-5 (5 min.)

### Reunion di Sirbishi:

Cantica 79

**10 min:** Algun Sugerencia pa Ofrece Revista den Augustus. Discurso cu participacion. Splica den 30 pa 60 seconde dicon e hendenan den territorio lo haya e revistanan aki interesante. Despues, pidi esnan presente sugerir ki pregunta asina por capta atencion di e hendenan y ki texto nan por lesa relaciona cu e topico principal di *E Toren di Vigilancia*. Haci mescos cu e *¡Despertad!* y, si tempo permiti, inclui un otro articulo for di un di e revistanan. Tene un demostracion con pa ofrece cada revista.

**10 min:** Necesidad local.

**10 min:** Kico Nos Ta Siña for di Lucas 5: 27-32? Discurso cu participacion. Laga un rumen lesa y texto. Despues, analisa con e relato aki por yuda nos den nos sirbishi.

Cantica 119 y Oracion

## Anuncio

■ Oferta di literatura pa **juli y augustus**: Uza e foyeto *Dios Tin Bon Noticia pa Nos!* of un di esnan cu e congregacion tin na stock y cu hende den bo territorio lo haya interesante. **September y october:** *E Toren di Vigilancia y ¡Despertad!* Ora haci rebishita, introduci e buki *Bijbel Ta Siña* of, dependiendo di e necesidad di e persona, e foyeto *Scucha Dios of Scucha Dios y Biba pa Semper*, y purba di cuminsa un estudio di Bijbel.

■ E asistencia na Memorial tabata pa Aruba 2.736, Boneiro 306 y Corsou 5.308. E tres islanan a alcanza un maximo nobo di 8.350.

## Algun Sugerencia

### Pa Cuminsa Estudio di Bijbel Riba e Prome Diasabra di Augustus

“Casi tur hende ta resa na Dios na un cierto momento den bida. Hasta esnan cu no ta kere den Dios ta resa ora nan ta den problema. Bo ta kere cu Dios ta scucha tur oracion?” Permiti e persona contesta. Despues, mustre e articulo parti patras di *E Toren di Vigilancia* di 1 di augustus, y trata e informacion bou di e prome pregunta y lesa maske ta un di e textonan cu ne. Ofrec'e e revista y traha un afspraak pa trata e siguiente pregunta.

*Nota: Tene un demostracion di e sugerencia aki na e reunion pa sirbishi di veld dia 3 di augustus.*

### TOREN DI VIGILANCIA 1 di Augustus ANUNCIANDO E REINO DI JEHOVA DIOS

“Nos a ripara cu hopi hende ta preocupa pa e echo cu pornografia ta plama tur caminda. Di otro banda, hopi ta esnan cu no ta mira nada malo den pornografia. Kico abo ta pensa? [Permiti e persona contesta.] Hesus a bisa cu nos por determina si algo ta bon of malo a base di e fruta cu e ta produci. [Lesa Mateo 7:17.] E revista aki ta analisa e consecuencianan di pornografia. Ademas, e tin algun sugerencia practico pa esnan cu kier stop cu pornografia.”

### **¡Despertad! ® Augustus**

“Mayoria di nos kier biba mas largo posibel. Abo ta kere cu un dia ciencia lo haci posibel cu hende por biba pa semper? [Permiti e persona contesta.] Tuma nota di e promesa interesante aki. [Lesa 1 Corintionan 15:26.] Pero con Dios lo logra esaki? Pa medio di ciencia of via di un otro manera? Y dicon nos ta bira bieu y muri? Den e revista aki bo por haya e contesta cu Bijbel ta duna riba e preguntanan aki.”

### Logronan Sobresaliente di Februari

Isla	Pio. Spec.	Pio. Reg.	Pio. Aux.	Publ.	TOTAL
<b>Aruba</b>	6	59	18	847	930
<b>Boneiro</b>	5	6	5	99	115
<b>Corsou</b>	4	154	23	1.708	1.889

Boneiro a alcansa un maximo nobo di 115 publicador.